

COLOMBIANO A PURBA DI VIOLA TURISTA

ORANJESTAD (AAN): Un caso di lamenta a tuma lugar na Eagle Beach. Y esaki a sosode net cu un turista cu ta biniendo di Argentina, cual ta e proximo pais for di cual Aruba ta sperando un gran cantidad di turista pronto.

Ta asina cu Central di Polis a dirigi un patruya na e beach ya menciona caminda un guardia lo a detene un homber.

Tabata algo pasa di 6 or di atardi cu un turista femenino procedente di Argentina di inicial E.F.S.S. di 46 aña tabata drumi boca abao riba beach, y dado momento un homber a dicidi di bula riba

e dama aki cu mal intencion.

E dama a dal un grito formal cu a pone cu dos otro dama a core presenta y a tuma nota di e homber cu rapidamente tabata purba di cambia su pananan pa no worde reconoci.

Un guardia mientras tanto a ser notifica cu a detene e homber Colombiano di inicial A.V. di 21 aña.

Polis a tuma e detenido y transporte pa warda caminda e lo tin cu bay responde pa su actonan den corte di Justicia, cu tin castigo pisa contra esnan cu ta haci nos pilar di economia esta turismo daño.

LADRON A BISHITA CENTRO DI P.P.A.

ORANJESTAD (AAN) Ladrón a bishita cuartel di PPA, y 2 yabi a desaparece.

Ladrón a tira un para den centro di PPA. E caballero denunciante J.P. a relata na Recherche cu ladrón a kibra drenta den Centro di PPA situa na San Nicolaas.

E anti-socialnan a kibra glas pa drenta, y for di

freezer el a saca varios limonada di varios color y sabor.

Siete caha di limonada a desaparece y ademas 2 yabi, no ta conoci ki funcion e yabanan tin.

Den un cuarto ladrón tambe lo a bishita, pero aki e denunciante no ta sinti falta di nada.

Relaciona cu asunto di pago atraza di trahadornan
FTA TA STUDIANDO OTRO

PROPOSICION PRESENTA PA GERENCIA DI CONCORDE HOTEL

ORANJESTAD(AAN) -- Te ainda no a soluciona e situacion reinante na Concorde Hotel.

Manera ta conoci, e gerencia nobo kier paga tur e trahadornan nan añanan di servicio y pa laga nan cuminsa completamente di nobo.

E sindicato FTA cu ta representa e trahadornan kier claridad promer den henter e asunto pa loke ta trata maneho di e hotel promer cu bay trata e asunto ariba mencion.

Un otro punto cu tambe a worde discuti ta e hecho cu e gerencia nobo a hereda un debe bieui di 1 Mijon Florin cu mester worde paga na e

trahadornan.

E gerencia a expresa di ta dispuesto pa paga esaki den diferente pago pero FTA no a bay di acuerdo cu esaki y hasta a indica cu si no bin solucion lo pone beslag ariba e hotel.

Den un combersacion ayera cu Pontilius, el a indica cu e intension ta pa pone beslag pero awor tin cu consulta cu nan abogado ya cu a bin un otro proposicion ariba mesa y mester analisa esaki.

Aparentemente tur cos ta draai rond di e reunion di awe pa mira kico ta e siguiente paso cu tanto e sindicato como e trahadornan di dicho hotel lo tuma.

Ayera nan por a subi avion pa regresa nan Pais

GOLPE DI ESTADO A SORPRENDE ARUBIANONAN NA VENEZUEAL

ORANJESTAD (AAN): E cercanía di e dos paisnan y e hecho cu prijsnan na Venezuela ta ventahoso pa Arubianonan ta motibo cu continuamente cantidad di Arubiano ta viaha pa Venezuela. Tabata tin basta Arubiano na Venezuela na momento cu un golpe di estado a tene e pais den su gara.

DIARIO a papia cu un di e Arubianonan cu tabata na Venezuela na momento di e golpe di estado. Mescos cu otronan cu no por a bandona e pais Diamars e tambe a regresa Aruba ayera.

El a muestra cu e tabata drumi den su camber di hotel ora 2 or di madrugada un persona a yame for di front desk pa informe cu tin un golpe di estado. El a worde bisa cu e no mester spanta si e scucha tiro y cu e lo no por regresa Aruba e siguiente dia manera el a planea como cu tur carettera a worde cera.

E siguiente dia e grupo di Aruba a baña y bisti pero ora nan kier a bay e piso abao di hotel nan a worde confronta cu e hecho cu luz a bay. Nan no por a usa lift mas y den scuridat a busca nan caminda pa yega abao.

Nan a worde muestra cu nan no por bandona e hotel debi na e situacion peligroso ariba caya y cu cada persona cu bandona e hotel ta haci esaki ariba su propio riesgo. No tabata posible tampoco pa haya cuminda den e hotel.

Afortunadamente banda di e hotel tabata tin un lugar cu ta bende arepitas y aki a haya cuminda. Anochi un conocir a bay hiba cuminda na e hotel. Nan por a scucha e ruido di cañonnan y den corantnan tuma nota di hendenan cu a perde nan bida na forma cruel. Muchanan cu a muri ariba nan cama caminda e tironan a alcanza nan.

Hende inocente a worde sorprende pa morto den e

Golpe di Estado.

Afortunadamente e informante di DIARIO tabata na un lugar cu a keda basta tranquil. E tabata tin suerte tambe di tin su credit card y di no a haci compra ainda. Tur hende cu tabata pa bandona Venezuela Diamars mester a keda e pais pasobra no por a yega Aeropuerto mientras cu ta un cantidad redicui di vuelo a bay pa cierto paisnan. Nan mes mester a paga.

Un stranhero cu kier a bolbe su pais mes dia y kier a bay Aeropuerto, a paga un chofer di taxi 4 mil Bolívar pa pasa cu ne den mondi y camindanan paden pasobra e careteranan tabata bloquea.

Si e Golpe di Estado a dura mas, su resultado lo tabata hopi tristo. Afortunadamente e situacion a normaliza. Ayera tur hende por a sali riba caya atrobe y Arubianonan por a regresa nan pais.

DESPEDIDA NA HULANDA DI SR. FELIPE TROMP COMO GOBERNADOR



ORANJESTAD [AAN] Na Cas di Aruba a tuma lugar un encuentro na unda tur empleadonan di e Kabinet tabata tin e oportunidad pa despedi di e gobernador saliente Su Excelencia Sr. Felipe Tromp y sra.

Esaki a tuma lugar dia 29 di januari 1992, ariba e ultimo

dia cu Sr. Felipe Tromp tabata fungi como Gobernador di Aruba. Ministro Plenipotenciario Sra. Ella Tromp-Yarzagaray na e ocasion aki a gradici Gobernador pa su sosten durante e añanan cu e a asumi su encargo.

Sr. y Sra. Tromp a ricibi un recuerdo den nomber di per-

sonal di Cas di Aruba, un cuadro cu e paisahe di Binnenhof, sede di Gobernacion Hulandes na Den Haag.

Riba e foto ta ser ilustra Sr. y Sra. Tromp ricibiendo e regalo di Cas di Aruba for di Minister Plenipotenciario na Hulanda Sra. Ella Tromp-Yarzagaray.